

庸
庵
文
外
編

庸庵文外編卷四

無錫薛福成叔耘

送吳南屏遊廬山序

戊辰

泛大江數千里。歷訪山川奇勝。以其所得。發爲詩。非
海內無事。不能得此樂也。往者。粵孽煽禍。蹂躪徧於東
南。凡名蹟勝區。沿江之衝。莽爲戰壘。幾逾一紀。童其崖。
赭其墟。海內逸人魁彥。趨趨不前。當此之時。欲尋勝遊。
以舒侘傺之胸。始不可得。自同治初元。柄任賢相。卒精
將武。策力並庸。遂奮百戰之功。不數年。剷除巨寇。東南
萬里。無鳴吠之警。山川佳氣。淑靈和清。宜必有流覽景。

物涵泳性情以鳴中興之運者天下之至樂其在此乎。今夫天台雁蕩羅浮峨眉之勝境洞庭彭蠡太湖汗漫之觀行人遊客日往來於其閒者趾相接也然識趣不遠乎俗則不足以盡山川之奇其才又不能發摠其所得韜其才者又或牽於職業不能博覽而遐探或雖身至其處心不開而神不曠卒亦與不至同然則有其時其地而不得其人不樂也得其人矣又必其人之能自樂其樂然後謂之至樂巴陵吳南屏先生以邃學鴻文遺外聲利家居有年一旦遶孤舟挾二弟子順流至於金陵侯相曾公止而觴之於幕福成因得與聞緒論兼

讀先生之詩文及所著書。撥華咀眞。觝轅前哲。其道可
師。而其氣又可親也。旣先生又歷吳越古城。訪靈巖。浮
西湖。南絕浙江。登會稽。探禹穴。返棹太湖。遊洞庭西山。
避暑慧泉之上。凡三閱月而復來金陵。獲詩文四十餘
首。先生之遊則樂矣。今又泝江西上。將爲匡廬之遊而
歸。吾聞匡廬多奇迹。石梁瀑布。仙人之所往來。又如五
老之峰。康王之谷。棊置錯峙者以百數。先生此行。倘躡
履而徧觀之。其有以助閎壯之思而益瑰琦之作者。知
必貺我於無窮也。

送日本某居士東歸序

戊寅

環地球九萬里。爲大洲五。爲國大者數十。小者數百。風氣互殊。終古不相往來。倏焉如肝膽之相傳。几席之相接。此非人所能爲也。天也。往者生民之初。山無蹊隧。澤無舟梁。民各居其地。安其俗。百里之內。或隔閼如異域。迄於今。泰西諸國。研精器數。駕水火。御風霆。舟車四馳。無阻不通。蓋宇宙大勢。由分而合。天之氣運。固如此。雖聖人其能禦之。今夫濱海互市之區。始皆遼曠寂寞。無人地也。邇者西洋賈客。車塵雜沓。輞輞殷殷。日夜行不休。通關巨舶。環貨山積。鬻藝者假靈造化。競巧鬪奇。或

自標教旨。冀與吾聖人之道並峙。擔簦杖策。周遊內地。轂交踵接。異哉。天將使昔之隔不相聞者。耦俱無猜。其風俗語言政教。浸漬漸摩。亦將齊不壹者。而使之壹邪。未可知也。光緒四年夏。日本某居士至天津。介青浦朱格仁靜山內交於余。并眎所爲詩文。其言嚴謹而閎實。蓋確守吾孔子之教者也。夫日本與中國同處一洲。非若他國之遼遠。居士守孔子道不變。非若西人之與吾異術。款談促膝。如舊相識。有不知其然者矣。抑余聞日本山水奇麗。古所稱蓬萊方丈瀛洲者。儼卽在是。仙人不死之藥。羨門安期生之蹟。猶有存者邪。又聞日本舊

國多古書。稍存三代遺制。余欲一往問俗久矣。他日者。浮海東遊。從居士訪山川之名勝。政教之異同。居士當不余靳也。方今時勢遷流。迥異古昔。雖窮荒絕域。猶將引而近之。況在同文之國乎。居士以八月東歸。余無以贈其行。姑與語天下大勢。居士幸藏於心。靜觀默察。數年相見。當有以貺余也。

曾劼剛云。聲色神味。無不得昌黎佳境。非用力精深。心手湊泊。不能詣此。

誥授資政大夫江蘇巡撫張公五十壽序

癸酉

同治十二年夏六月十有二日。爲我大公祖中丞合肥張公五十壽辰。江蘇官吏搢紳皆將晉詞爲祝。福成等亦獲從部民之列。趨風櫛脰。謹擇言以侑爵曰。古之名臣。或奮迹艱難。提兵四征。虔劉羣寇。而欲於無事之時。澄肅吏治。或所不逮。或能精研利弊。廉惠公勤。俾士民愛其丰采。而休澤被乎無窮。則景鑠之功。又往往不著。蓋文治與武功。兼之實難。卽兼其才矣。而遭時或未暇。或其地不相值。則仍不能兼其事。然則功名者。天之所吝。天苟非錫之以全福。則全名不可得而有也。惟我大

公祖合肥張公曩值海內多故以書生蹕起里閭自募一軍從今相國李公赴援三吳風邁電發無堅不摧掃除封狼盡收吳地厥後李公廓清中原公之軍未嘗不從部下將士以功薦擢建牙專閫者未可以一二數而公亦遂觀察徐方陳臬畿疆前相國曾文正公倚如左右手凡其時營務之措注糧餉之轉輸及理財察吏明刑諸大政一切以公綜理其成論者謂曾李二公之偉烈得公贊助之力爲多

天子亦詔公才可大用爰命移藩山西練兵防河則回酋聞風懾伏不敢東嚮以窺三晉進督七省漕運甫受

事而撫吳之

命下旋權總督兩江兩江兼轄安徽爲公故鄉蓋

異數也權兩江三閱月復來莅吳公之爲政務鎮靜持
大體不事更令改章然勤民急公孳孳靡勑案無留牘
邦無曠功從容咨詢治絲不棼其率下則清而不刻和
而不徇懲抑姦蠹必慎必嚴官吏悚息奉法各張厥職
櫛垢除瘡民以大和竊嘗追溯十稔以前江南北無完
土子黎喁喁不得一夕甘寢賴淮軍百戰而出諸水火
之中公之威望赫然炳人耳目乃星未一周而復持節
以來吳中父老額手稱抃政成頌作如鼓應桴則所謂

文治與武功。公實以一身兼之。而天隱若惠此一方。欲公之竟其全績者。則天之錫福於公。以福我三吳也。夫豈有量邪。抑福成更有言者。往自徐州戎幕。始奉光儀。迄於今。雖離合不常。常獲一再進謁。竊歎公位高而心益下。業廣而氣益斂。莊子所謂其天守全。其神無卻者。與。夫然。故德完而福備。福備故富貴祿壽康彊逢吉。皆公之所自有。皆不足爲公頌。若福成等所稱願者。惟祝公之久。殿南服。優游漸摩。以臻盛治。庶幾疵癘寢伏。兵氣永銷。俾吳民樂其麻。而天下亦被其澤。此則私衷脈脈所默爲吳民祝者。而尋常頌禱之詞略焉。謹爲序。

蕭母黃太淑人八十晉一壽序

丙子

昔昌黎韓子謂懽愉之辭難工而窮苦之言易好自宋景濂以壽文入集後世踵爲之者往往徇俗薦諛被譏通儒如震川歸氏望溪方氏立言必衷古訓雖常謂壽文可芟而傳者頗多蓋必曲體孝養者之心則稱述懿嫻以詔其子孫禮所宜也福成與富順蕭君廉甫爲兄弟交近十年每聞廉甫道其曩昔艱苦之境庭闈積累之業心識之不能忘光緒二年七月上浣爲伯母太淑人八十晉一設輓之辰知交將詣舉觴爲慶俾福成爲辭旣辭不獲乃述所聞曰太淑人系出江陽黃氏生稟

懿粹清芬益劭以歸贈中議大夫嵩高先生中議公績學不遇家益貧晚以化居自給終歲卒卒在外不遑問家政太淑人節縮衣食承闕緝匱外償宿負內以紡績佐甘毳得舅姑驩心侍姑疾左右扶持自聯中裙浣滌靡少勑也振人緩急如恐不逮里中惇獨者孤寡者衰且癯者歿無棺者必獲所求以去嘗使鬻妻者將離而獲全不肯者感德而思改周卹親鄰雖遇其空匱竭情籌度靡少吝也居舅姑之喪盡誠極哀佐中議公庀大事惟腆教四子讀書治生以次成立恆劬十指以贖所費不繼則典質以濟之必令得當乃已靡少歉也蓋其

仁孝慈儉約己厚人歷數十年如一日以是當劇寇俶
擾時雖播遷流離屢瀕於危常若有神相之者治家課
孫櫻變不渝積和蘊祥卒享丕祉今其長子槩卿廣文
以庚子舉人當得知縣謁選吏部次子樹卿俊卿侍太
淑人於里色養無違季子廉甫由翰林改官再爲天津
縣令政聲隆然大府嘉異駸駸將顯用諸孫十五皆能
以詩書自澤補博士弟子員者四人自中議公捐館舍
太淑人每獲家慶必令焚香以告時時寓書誡子勛以
令名家人在側者尤昕夕匡敕廬暨無倦容雖壽登大
哉而神明茂清康彊猶昔日天之降祚於太淑人者其

未艾邪。福成獲交廉甫久。不敢以尋常頌禱之辭相溷。
故撮舉太淑人積累致福之由。與其艱苦歷嘗之境。以
眎其後之人。俾知所鏡焉。舉以質諸同人。同人皆曰。然。
遂書之以爲壽。

章母沈太宜人七十壽序

甲申

昔劉向撰列女傳以母儀居首曾子固序之亦謂王政所自始大抵載籍所傳仁聖賢人命世偉才與夫碩學魁儒未始不成于賢母之教而賢母之名亦與之俱永是故母德以教子爲大子職以顯親爲重此古今不易之常道也歲在甲申三月下浣爲我章年伯母沈太宜人登壽七十設帨之辰同年友琴生編修與福成相善久謂福成宜爲之辭福成辭不獲乃敬以所聞于琴生者進而言曰太宜人能孝于舅姑逮事祖姑汪太安人及姑胡太宜人僶勉周旋承愉化隙終無閒言躬率子

婦勤操作。先雞鳴而興。後斗轉而息。相夫子必于仁厚。年饑民病。勸奉直君出穀振佃人而燔其券。歲暮則命其子。矚鄰里之門。時其匱乏。周以錢米。人有受其惠而不知者。琴生幼時。太宜人。口授句讀。夜讀倦。頭觸机。欲睡。太宜人舉礮聲警之。覺則述古人勸學事以相勸。乃益奮讀。漏三下不輟。如是以爲常。咸豐同治之間。皖南被寇。太宜人攜子婦。轉徙萬山中。履險瀕危。卒免于難。嘗以耕讀勉琴生兄弟。漸爲鄉里善人。雖糗艱迫阨。而神不加悴。旣而琴生成進士。入翰林。累邀

寵誥。兩弟持家。能守先業。其季亦有聲庠序。貢成均。諸

孫嶷嶷有立太宜人願而樂之然追念疇昔事常恍然于懷雖顯榮蕃盛而意不加愉蓋太宜人之順于舅姑宜于夫子刑于子婦其所以作則于家而垂祉于後者固有其本矣若其始終訓督琴生兄弟至於學成名立乃其數十年之精力所萃而靡有已時者琴生今參合肥傳相幕府贊益日宏且遠恢張令聞駸駸光顯可計日待此則劉子政曾子固之所闡揚而古今育才之盛與國家成教之基鮮不溯源於此者也福成近者有浙東之行未及舉觴爲慶敬留一言以別琴生惟祝琴生據其所韞起爲名臣於以濟時艱而慰親志庶使太宜

人教子之名與陶士行歐陽永叔之母並揚其徽烈是
乃朋友責善之誼也退遂書之以爲太宜人壽

馬貞女傳 壬申

同治壬申夏五月十六日金匱縣民馬廷燦之女以守貞不污被殺於其舅氏子范金縣令張君佑璧詣驗得實乃命善爲殯斂躬自拜奠觀者無不歎息隕涕者旣定讞如律遂以達於行省大吏而爲貞女請旌於

朝於是縣中交口述馬貞女事馬貞女之節著於近遠云初貞女之母范氏早卒其父廷燦貧而愿恆居市廛女依其從母施媪事之如母年十八字包文煒嫁有日矣舅子范金素無行每往來施氏介施媪遺女服飾女立毀之無完者金爲氣沮久之金父有疾施媪往問之

欲與女偕。女辭不往。媼誡以危語。乃勉從之。夜常不解衣而寢。每登閣。必捐其階。已而金果攀緣狙伏。徑前劫女。女奮身抵拒。且號。金以衾蒙其口。悶遂絕。明日。范氏使赴於廷燦。且誣以蜚語。廷燦果怒。不往視。乃亟斂而殯之。厚賄漆工。戒勿聲。漆工倦而假寐。忽見貞女被髮立於前。既歸。復見之。出以告人。會金之從叔范慶醉而罵金。具洩其事。眾乃大譴。廷燦偕包氏首於縣。時金已逸出門三日。惘惘無所之。歸坐縣署旁之茶樓。自訴其事。吏役異而詰之。忽作女子音曰。我死甚苦。遂執之一訊。卽服。復執訊施媼。媼自縊。金父疾已篤。聞之。亦死。貞

女死凡十日而其冤大雪明年范金伏法於蘇州葬貞女錫山之麓表其上曰馬貞女之墓

蕭敬甫云起結處皆具春秋筆法敘事亦簡暢可誦

例授文林郎舉人崔君家傳

壬午

君諱書黻字采堂江蘇荆溪縣人余作處士崔君家傳所謂兄弟三人自爲師友者君其季也君性穎悟少則卓犖不羈爲文自關畦徑出與儕輩角藝以郡試第一補博士弟子員九試南北鄉闈累薦累躋咸豐五年始舉順天鄉試一試於禮部不遇遂不復出君少好縱橫家言善料事兼習治生術家故饒於貲君庀家政貫貸以時斂散有經道光季年大府檄州縣勸建義倉君倡輸田百畝董其成俄而頻歲大稔倉無餘儲君復遣人陰察傳近乏食者旬餼以粟歲終戶給錢數陌勸族黨

有力者分行之人。但恨不獲居君之鄉。而未識其端發於君也。崔氏族繁衍。貧富錯居。田逾萬畝。而賦不時輸。糧胥以催科不力。遭官扑責。飲毒死。其家洶洶將基。崔宗君挺身出貸千金償之。事遂寢。君之仁足以庇其族。而才克副之。大率如此。然君所以事親事長。遇事盡職。以合乎庸行之當然。而不自曝於人。人亦不能盡知也。古誼不明久矣。先王教睦婣任卹之行。必本孝友。有一鄉之善士出焉。好行其善。而一鄉治。積而至於縣。於郡。於行省。莫不皆然。而後天下可治。若君旣澤被一鄉矣。豈非治天下者基邪。粵寇之陷荆溪也。君避之蘇州之

角里又避之靖江主講馬洲書院會寇已退遂歸君少
任氣果於有爲晚乃深自警悔教其子徵曦一以馴謹
徵曦病卒君以痛子鬱鬱亦卒同治九年十二月十四
日也年五十有八孫三人

薛福成曰余聞君避寇角里時值趙忠節公景賢以鄉
兵守湖州遣將分屯長興之夾浦夾浦密邇荆溪君嘗
微服歸里偵賊虛實稍稍部署欲將有爲適湖州不守
君乃渡江而北惜哉君之志於是隱矣夫士當多事之
秋欲奮樹功名而事機不諧終湮沒無聞者固不可勝
道邪

薛氏殉節華夫人顧夫人家傳 辛卯

從母華夫人同縣國學生諱某之女

贈資政大夫季父寄泉先生之配也以嘉慶十年
月 日生季父早卒遺孤福增尙幼夫人茹檠守
節持家教子二十年如一日性和婉撫從子如子福成
兄弟幼時雖頑鈍未嘗加以疾言遽色咸豐十年夏四
月庚午粵賊陷常州是時伯父芷軒先生倡議家人毋
得遷徙或舉曾子舉武城事以規之謂無守土之權之
責徒委身家以餌強寇無當也伯父不聽夫人等素嚴
事伯父遂不敢違福增授徒南鄉寇警日棘乃募擔夫

入城欲迎母妻鄉居避寇撞門門堅闔不可開居室既深竊內外不相聞擔夫欲取巨石壞門福增懼爲伯父所斥責搖手止之潰卒闖駢於衢洵洵有欲虜人意福增危迫無措徘徊終日仍退出城甲戌城陷夫人自縊於空室而從嫂顧夫人亦入井以殉與夫人咫尺相望云越三年官軍克無錫夫人與顧夫人皆以節烈奉詔旌表光緒十四年以從子福成官

勲贈夫人

從嫂顧夫人從兄

卽贈雲騎尉世職優廩生祀望先生之配同縣國學生

諱某之長女。以道光十四年九月丁卯日生。顧氏與薛氏爲世戚。夫人幼時容德已甚著。三黨無閒言。伯父芷軒先生思得賢婦。乃請於夫人之祖母爲重親。年十八歸於岷望先生。甫三日卽釋新衣赴庖。操作甚劬。岷望幼失母。繼母徐夫人持家政。伯父性方嚴。岷望事親孝。常恐失父母驩。痛自貶。御妻尤嚴。夫人事繼姑如母。保抱小叔小姑如弟妹。恒以一身兼婢媼之役。伯父晚年尤卞急。薄物細故。厲聲詰責。勢若霆摧。岷望恐違親意。則雖弟妹僕媼之過。悉引爲妻過。夫人恐違岷望意。則雖姑叔僕媼之過。亦引爲己過。順受譴責。罔敢自恕。

粵賊陷常州也。夫人母家既定徙所。其弟奉母命來迎。夫人同去。夫人辭曰。吾不忍離吾舅姑與夫子而獨生也。無錫旣陷。闔城鼎沸。夫人聞賊叢刃抉門聲。抱子見寶赴井死。明日。岷望罵賊遇害。越二十八年。岷望以從弟福成官。

貤贈資政大夫。

贈夫人亦如例。

福成曰。嗚呼。粵寇之禍酷矣。大江以南數百城。悉遭蹂躪。戶口纔存十二三。其被驅脇。冒鋒刃。嬰饑疫。轉徙流離而死者。殆將以億兆計。其中耆紳碩士。烈婦貞女。甘

死如飴一瞑而萬世不視者亦何可勝數均之一死而所以死之輕重不同矣嘗閱忠義局所蒐訪一邑一鄉之姓名彙冊將盈咫竊悲其湮沒不彰然此固一邑一鄉之元氣也其在家則一家之元氣也今日所以康濟艱難重享清平者豈非賴元氣之厚乎因謹誌二夫人殉節崖略以概其凡焉

書方烈婦事 己卯

國子監生陽湖方恮襄事畿輔通志局以勸學溫文爲同輩所賓異遽遘疾卒旣歸其喪其妻趙氏以烈殉總督直隸伯相合肥李公爲奏聞於

朝旌表如例矣而烈婦之父前知易州直隸州趙烈文惠甫甚悲其女復貽書請記其事惠甫世居陽湖今僑寓常熟烈婦其長女也歸方氏刻苦持家慕禮義如不及一子長綬甫六歲而恮旅沒之音至其父迎歸徐告之烈婦慟絕良久乃能哭以頭觸戶將死時方娠其父戒勿辟踊冀育次子泣應曰諾遂不復言死然平居與

兄妻及妹言皆身後事。密購毒藥藏之枕篋。家人搜得。潛棄之。亦佯不省。如是者再。親故來勸勉者。亦不與深言。旣生一女。眾咸不怡。微睨之。無戚容。曰。生女亦善。使我無繫戀心。一日。乘家人熟睡。潛起趨後舍。自經死。距聞赴百三十有二日。距免身八日。實光緒四年九月四日也。夫孝子割股烈婦殉夫。不可爲天下訓。以其事難責之人人也。然至性鬱結。一瞑不視。則其得於天者獨厚焉。行雖過中。不得謂之不賢也。嗟哉烈婦。奮身從夫。舉人世之事。無足以易其慮。此其中必有不如是而不自得者。惠甫於是爲有女矣。余故略加論次以塞其悲。

亦以暴烈婦之志云

晉涿州獄 丙戌

道光季年涿州有富家婦謀殺其夫者。實用木器壓其喉。氣悶而殞。乃以組繫項。作自磬狀。以聞於官。官馳往驗。謂洗冤錄凡自縊者。血瘀直入髮際。八字不交。今此尸喉間有勒痕。與自縊者殊。疑有別故。既廉得姦夫主名。繫鞫之。具伏其平日與婦有私。及合謀殺夫狀。遂以絞勒定讞。論罪如律。是時刑部郎中滿洲耆齡公總理秋審處事。詳閱尸格。謂絞勒者八字必交。今究厥傷痕。明與絞死者殊。疑其有枉。欲以平反爲能。因自知罪可逭。亦遂抵死不承。重賂宗親長老。連控於都察院。均保。

此婦行貞潔力請直其謾刑部彙覈奏上是時

宣宗恤庶獄尤劬又懲治道飢餓思一掃刮振勵之特賞耆齡花翎記名以道府簡用

天語褒獎且勉刑部司員盡當法耆齡凡初讞是獄者譴謫有差並以良家節婦橫遭誣蔑

特敕有司建坊旌表於是耆齡折獄明允之名聞天下不數年涿人始共傳言被旌之婦已與姦夫自配爲夫婦盡踞富家田宅有之矣其婢僕亦稍稍出言其舊主死狀有流涕者於是天下復知初斷是獄者之不誤也然以案經

欽定罔敢有言耆齡旋出守廣信未及十年超擢兩廣
總督改福州將軍而涿州所建之坊至今巋然尙存夫
讞獄誠不易而讞人命尤難彼木器磕死之痕謂爲自
縊與絞勒者同一失實然因姦謀殺則原讞爲近之
聖人在上仁心仁聞彌綸寰宇爲臣下者未能承流宣
化俾底刑措稍有疑竇又不能盡心推究轉令巨憝稽
誅以貽人口實有司者之咎也儻所謂失之毫釐差以
千里者邪烏虜治獄之官豈容稍有偏倚意在深文固
失其平意在平反亦失其平光緒二年餘杭舉人楊乃
武之獄當時浙士在都者議論洶洶必盡翻前案始慊

侯相左文襄公嘗述涿州獄以語座客。其是非至今亦疑莫能明也。自後浙江州縣逆倫之案，上官鑒前事，皆以輾轉駁詰爲宕延計。兇徒無一伏法，而無辜證佐往往十餘年不得釋，羈死囹圄者頗衆。竊謂事之不平，至逆倫之案而極。賴執法者先平其心，乃能劑不平者而使之平。若研之未審而遽欲平反，彼自謂平者，乃至不平也。莅至不平之事，復以至不平之心助之，充其極，不至釀至不平之禍。如近日浙江事不止。然平反者之初意，亦豈料其流極至此不平邪？彼其用心，不過幾微失其平而不自知也。是以古之善治獄者之宅其心，必曰

如鑑之空如衡之平

方存之云此爲浙江楊乃武一案而發作者在浙東
深鑒其流弊暢切言之殆與空談時務及僅據傳聞
作文記事者不同矣

定海三忠祠碑 乙酉

國家褒禮忠節邁越前古千百其有效命疆場蹈大難而不慄者未嘗不贈秩賜諡並於死事所建專祠所以發揚其光昭示無窮微特以安幽靈順民志也道光二十一年英吉利再陷定海時則山陰葛壯節公雲飛爲總兵與壽春鎮王剛節公錫朋處州鎮鄭忠節公國鴻同守力戰六晝夜死之今海內所稱定海同日殉難三總兵者也旣得

詔優卹如禮有司以費不具附祀關帝廟之啟忠祠厥制湫隘不稱日月旣遠棟宇敝侈盲風淫雨旣濺且扇

丹青黜昧金石缺如。祈眤來庭。用萌數思。越四十年於茲矣。光緒十年。屬又有法蘭西之釁。湖南成君邦幹以台州府知府統兵駐定海。至之日。謁於祠下。慨然顧諸將士曰。男兒出身勤國事。生當封萬戶侯。死當廟食百世。如三公庶幾不負者。茲爲其授命所。而俎豆他寄。神用弗歆。甚不足以稱。

朝廷褒忠之典。吾當率先飭而新之。眾皆曰。願盡力於。是度陟哀費。慮材鳩庸。檄紳士武鎔盤等董其事。閱四月。工竣。成君率所屬將佐親拜堂下。無不感奮動容。人誓以死禦敵。明年春。法艦薄鎮海口門。我礮臺先後。

擊中其兩艘相持數月敵計益窮是時民間謹言夜見
海濱神燈無數有葛將軍朱將軍效靈助戰以故浙東
郡縣二十餘城晏然不驚若寇未至者葛將軍蓋謂葛
壯節公朱將軍謂故金華協副將朱公貴亦以禦英吉
利戰死慈谿大寶山者也鎮海守備旣堅定海尤危甚
海道中阻軍書檣械皆取閒道夜渡去法船密邇卒幸
無事成君亦晝夜督勵所部設備維謹法船終不犯定
海會和議成乃退去自海上多故浙洋有事則定海常
爲之衝形勢孤懸四無險阻故凡守定海者皆視爲絕
地嚴兵待寇而終未與寇遇自成君始雖由善守亦若

有天意焉。夫人事不至而聽於神。此必敗之道。神固不祐也。若人事至而神應之。蓋積感相通之理。況以前賢忠義之風。激發軍民。萬眾一心。氣勢益壯。雖猾悍之寇。有不聞而卻避者邪。福成既以定海三忠祠與慈谿朱將軍祠事達於大府。請爲奏聞於

朝。加封號列祀典。又嘉成君固守定海之功。且得鼓舞將士之妙用。因爲甄敘其大凡如此。并係以樂章俾定海之民歌以祀焉。若三公忠勇大節已焯然在史氏記。茲不具辭曰。

海思兮雲愁。溯迢迢兮碧流。結夫容兮延企。渺神山兮

不可求。望九州。兮黯如霧。吾叱蒼龍吹篴兮。白鼉擊鼓。
棄埃雲兮歛上征。吾將叩紫闥兮。窮神靈之所處。紫闥
兮四開。吳戈犀甲兮光裴回。雲爲輦兮風爲御。羽旄紛
兮靈之下。忽披髮兮顧大荒。伴猿鶴兮往翱翔。朝丹山
兮暮赤水。白楊蕭蕭兮。見昔日之戰壘。戰壘高兮古骨
橫。西風颯兮愁冬青。身雖殄兮靈不滅。炯丹心兮炤白
日。揮長劍兮屠蛟鯨。一掃海宇兮鏡再清。天吳歌兮海
若舞。駕文螭兮來復去。燾我民兮受天祐。

浙東遺愛祠碑

戊子

予以光緒十年夏奉

命分巡浙東聞署前永豐里舊有三公祠者祀故巡道王公爾祿胡公承祖段公光清其先實胡公生祠也祠久燬於兵予過其遺墟緬懷前徽輒爲之躊躇悽愴欲重建而新之會有軍事卒卒未果旣復考郡縣志以詢之諸父老乃益歎三公之澤之長也父老之言曰王公以順治初年當巡海之任務持大體宣德意於勝國遺民多所保全創設書院以澤多士由是士皆嚮學益份份矣胡公繼之邕容坐理垂十餘稔旣去而民不能忘

至爲立社。最後段公由鄆縣令洊擢府道。蓋嘗三定民
變化其戾氣。薰爲太和平賦役。修水利。其犖犖大者如
此。此吾郡士民並祀三公之意也。抑尙有未慊焉者。段
公之前。蓋有陳公中孚。嘗濬城河。復三喉故道。吐納旣
靈。疵癘寢伏。李公可瓊。嘗倡脩東津浮橋。行人不病涉
險。蒙其蔭者。餘六十年。且二公俱好士。陳公加書院膏
火。李公別設雲石山房。文會以課士。一時瓌俊多出其
中。其所以嘉惠我浙東者。與三公後先相映也。今將重
新三公之祠。爲誼甚盛。然如陳公李公者。亦宜奉嘗勿
輟。固邦人士所願也。予聞而趨之。詩曰。蔽芾甘棠。勿剪

勿伐召伯所茨。苟有德澤在民。民之思之者。如此其摯也。五公之嘉績善政。能使輿情抃詠。至今不衰。殆有召公之遺韻焉。於是建復祠宇。並祀五公。思揚其光。垂之無窮。且以慰士民慕戀之意。書其語以鐫於石。祠曰遺愛者。紀實也。祠爲堂爲室。各三楹。室故有義塾。今顏之曰養正。系之以詩曰。

四明之垠。甬江之濱。鎖鑰浙東。民物如雲。海防攸寄。三郡是庇。惟良司牧。濯瘼興利。嶽嶽五公。設施不同。前後相望。二百年中。丰采常新。闡澤布濩。我思公賢。如或神遇。民之感德。若鼓應枹。直道無私。不分智愚。地有遺惠。

精神所麗報以脀蠶終古弗替祈毗致慤瞻拜階庭桂
醕椒漿明德之馨神靈孔邇永錫蕃祉風馬雲車翩其
來止

代李伯相羅太夫人墓誌銘

丙子

光緒二年春陝西延榆綏總兵官記名提督劉厚基聞其母太夫人之喪大府念西北邊警未息援金革毋避之禮奏留本官

詔可予假六月治喪事將以今年某月某日葬太夫人耒陽縣之某鄉某原先期具事狀來請銘其略曰太夫人耒陽羅氏諱某之女

皇贈振威將軍提督府君諱某之妻年二十二歸府君以不逮事舅姑爲憾歲時營祭必誠必腆府君家貧授徒以自給太夫人縮衣貶食裁冗緝匱庀家政鉅細畢

舉府君以是無內顧憂。厚基早孤。太夫人紡績養子。教督日益嚴。粵寇起西南。徧躪緣江諸行省。一時豪傑皆應募殺賊立功名。太夫人勉厚基以大義。俾奮身從戎。所嚮有功。累官至記名提督。拜延榆綏總兵之命。太夫人就養官廨。方邁疾。而厚基提兵在外。

天子爲賜人參療之。良已一軍將士以爲榮。太夫人念族黨中孤寡篤老多窶。且孀者謀所以振之。乃命厚基蠲重金。自歸鄉里。買田若干頃。立義莊。設家塾。具賓興費。將歲事矣。以光緒元年十二月丙子卒於家。享年八十有二。以子厚基貴。

誥封一品夫人孫承恩蔭生昔某於同治九年督師入
陝聞人稱厚基之績弗衰今復能輯和其軍民不肯聽
其一日釋官以去亦其漸漬於母訓者然邪太夫人可
謂能教子矣是宜銘銘曰

忠孝之架百祥之門積勛韞善以薰子孫我銘其藏既
固既敦

代李伯相前陝西按察使權巡撫事張公墓誌銘

己卯

光緒四年冬十二月丙子前陝西按察使權巡撫事張公卒於京師寓舍孤兆蘭具事狀請銘於某其略曰公諱集馨字椒雲揚州儀徵人曾祖諱盛祖諱能烜考諱式堯兼祧考諱式均本生考諱式封皆以公貴

誥封資政大夫妣氏吳兼祧妣氏鄭本生妣氏許皆

誥封夫人公以道光九年進士改翰林授編修累充湖北河南副考官旋知山西朔平府事擢福建汀漳龍道以憂去復起爲陝西督糧道擢四川按察使進貴州布

屏風 卷之四
政使未及赴官調甘肅又調河南奉

命勘事山西事畢入對仍還河南以事奪職遣戍復起
爲河南按察使遷直隸布政使粵寇北犯公帥師防剿
迭有斬擒會總督與大帥不相能劾公奪職遣戍復以
接戰大勝留營從克臨清州及馮官屯

賞五品頂戴發江南大營充翼長旋引疾歸復起爲甘
肅布政使以憂去旋除福建布政使調江西以事奪職
復遷爲陝西按察使權巡撫事時回寇方熾西安將軍
多隆阿率勁兵入陝公會師進剿不數月全陝悉平俄
而新巡撫來莅事公旣受代奉

命赴甘肅審度剿撫事宜。復被劾落職。永不敘用。旋以剿賊獲勝。銷去永不敘用處分。俾率所部援狄道。河州。公遂引疾回京。凡十四年而卒。壽七十有九。公性警敏。尤練於吏事。治朔平。值旱蝗。用古法掘塹驅之。以粟代價。收買蚶蟹百數十萬斤。蝗不爲災。督糧陝西。以歲饑。請蠲緩。巡撫林文忠公則徐嘉其識。具疏密薦。陳臬四川。誅鋤巨盜。平反冤獄。禁州縣之私繫無辜者。及爲布政使也。甘肅地曠瘠。丁糧多不時納。納銀又違市價。州縣懼償所耗。則虛報旱災。以虧公帑。公明定章程。凡已徵不解者。勒限嚴追。積弊遂清。河南地大物博。起運及

河工加價銀幾三百萬兩。州縣習以延宕爲虧挪計。公造征解清冊。載明應征起運。已征未解。留支實欠各款。時時稽覈。按冊嚴提。不半年。庫儲無缺。額人以是服其精。及居京師。翰林年輩無如公者。公優游鉛槧。以道自頤。時與諸髦俊文譙爲樂。主講金臺書院。教士猶不勸。云。嗟乎。世方操成法以繩天下之才。當官者務渾其才智。而謹身選事之流。轉得自託於中庸。卒之焯有樹立者。不數數觀。若公之才。足以宰物理。民智足以審時應變。乃旣起旋躡。至於三四。或邂逅呈議。幾不能自解免。才智誠不易得。得一才智者。而困於訾訾之口。又不肯

稍自斂抑以就繩墨。黜焉不得究其用。斯其可慨者已。
公初娶黃氏。繼娶邵氏王氏皆

誥封夫人。先公卒。子一。兆蘭。兵部郎中。女一。適候選郎
中李經方。孫一人。兆蘭將以光緒五年冬十一月某日。
葬公儀徵縣之某鄉某原。銘曰。

文宰羣倫。武振三軍。胡屢貽屢奮。而不能息眾謗之紛。
紜。志百韞而一施。豈人事之多歧。抑天命之不可知。閔
其休祉。後昆是貽。鑒辭寔石。用諗來茲。

代李伯相 誥封光祿大夫兵部左侍郎徐公墓

誌銘 己卯

誥封光祿大夫兵部左侍郎徐公諱夔字俞臣績學砥
行能文章尤攻制舉業研貫經史沈思孤詣老師宿儒
往往歎服試於有司輒寔公亦不追時好以求合益發
宋元以來儒先之書擿齟涵泳而壹返之身心化其家
以及一鄉翕然而和教其子弟以及一鄉之子弟斐然
而成旣以子樹銘貴由太學生受封如例公闇然自守
如布衣時若無窮通顯晦之足搜其心者樹銘累督山
東福建學政公一再就養至則登泰山覽滄海以拓襟

抱嘗教樹銘所以施於其職者輒爲後人法程然公不樂久居於外歸而澹靜自頤徜徉山水泊如也惟勛樹銘及時報

國年七十有七卒於家樹銘在都聞赴具事狀來請銘竊惟士大夫讀書發聞早躋清華其先世必有闕其休德不遇於時者蓋鬱之厚而必昌其理然也某與樹銘爲同年生相知最久誼不可以不銘按徐氏自公以上十餘世皆居長沙曾祖諱雲上

貤贈資政大夫祖諱光楚

誥贈光祿大夫父諱國楨

誥封光祿大夫公性純孝居父母喪年已六十哀毀盡禮既葬益繕完遠祖祠墓修輯譜牒周宗黨之貧乏者斬副先志所未逮御下仁恕苟有青輒語子孫曰此輩一受惡名終身不齒於倫類雖欲自新無繇卒貴之人亦卒無以欺市者公之以德化人多如此子樹銘由翰林洊擢兵部左侍郎日益光顯矣以言事左遷大理寺少卿樹鈐江蘇候補同知樹錄太學生樹釗前知江蘇六合縣樹鋒浙江候補知縣樹鐸議敘布政使經歷孫八人公卒於光緒五年三月十四日樹銘等將以是年某月某日葬公長沙縣東鄉大賢都之原配張氏

累封一品夫人先公卒別葬長沙東鄉嶽基山銘曰
嶽嶽其容淵淵其衷積塞乃通瑾瑜在握盲者弗矚奇
輝韞櫝有子多文超倫軼羣騰躡青雲潛德所耀後昆
是燾雋聲彌劬山高谷空地大天穹奠此幽宮我銘質
直不磨不泐下訊無極

季懷弟云澹雅

代李伯相直隸按察使丁公墓誌銘

辛巳

光緒六年夏六月丙戌直隸按察使丁公卒於官余駐天津聞赴臚公戰功政績奏於

朝得

旨宣付史館立傳贈太常寺卿許天津紳民建立專祠並

賜卹如例其孤奉喪南旋將以今年月日葬公合肥西鄉椿樹岡南之新阡公之從弟德昌具事狀徵銘於余余與公生同縣知其先德爲詳公又從余征剿十餘年官畿輔將十年然則宜銘公者莫如余矣公諱壽昌字

梁山先世由無爲州遷居合肥之龍潭河。曾祖諱周雲。祖諱永貴。父諱世和。世以輕財積善聞於鄉里。皆

贈如公官。公始攻舉子業。未竟所學。會粵寇干紀蹂躪淮以西。無完土。公隨縣中豪傑練鄉兵。擊賊嘗會攻巢。無爲潛山太湖等城克之。是時築寨自保者。所在蠶起。勢分力弱。不獲大展其能。同治元年。余奉命統軍。駐上海。以規全吳。公領偏師從大軍進拔蘇浙郡縣二十餘城。擒馘僞王以下數人。招撫降眾數萬。又從征捻寇。轉戰大河以南。東薄海隅。西踰淮漢。迭奏奇捷。助守運河。長牆會圍捻渠。張總愚於高唐州境殲之。積功洊擢以

按察使遇缺題奏

賞戴花翎加布政使銜西林巴圖魯名號方世之多故
任事者往往以權奇自豪公平居恂恂質直無華一旦
棄佔畢履戎行奮然有所樹立余始知公以儒生而優
將略也公以同治九年任天津河閒兵備道適值天津
民與西洋傳教士積有違言互相猜嫉公平心調劑消
去畛畦興利布化民以大和頻歲大水公手定章程勞
來撫卹全活無算以憂去官士民攀留及籲請起公於
家者積牘盈咫服除權津海關道時北方大旱赤地數
千里公勸民分財振救昕夕孳孳鉅細必親饑者得食

而山西河南咸仰其轉輸全活尤多除直隸按察使攝
布政使半年還爲按察使弊能去貪清理滯獄惠澤下
布風紀肅然公居官力懲養尊飢馘之習勤身率下如
治軍時凡所措注雖專門名家無以難之余又知公以
賢將而擅吏才也夫士或有過人之才而困於無資地
擯不得施用旣用矣或優於此者未必不絀於彼若夫
文武具備焯著成績如公者天若將有以大用之矣乃
復奪之年所就遽止於此此有爲天下植才之責者所
不能不盡然流涕以悲者也公坦中樂易持躬清儉然
篤於風義周親故之急必腆不以有無屑意修家乘建

宗祠創義舉尤獨力任之無少勌享年五十有五配董氏繼配趙氏皆封夫人子功浩功勳功浩議敘通判文一適刑部郎中何雲藻孫一人銘曰

蜀山蒼蒼肥水泱泱篤生豪彥振轡騰驤公參我軍奮厥智勇我倚公才珍如珪琪公襄我政威惠咸宜爲民除瘥煦寒哺饑民豈無良戶謳巷祝公來民慶公逝民哭

九重悼惜報以馨香傳公行能萬夫之望有幽新宇永縣松檟窆石饒辭用詔來者

季懷弟云敘事一氣旋折辭義雅潔銘墓文正宗也

登泰山記

丙寅

必置身高明之域。然後心與目不蔽於邇。有以發吾胸中閎廓俊邁之趣。所居彌峻。所涵彌遠。昔孔子登泰山而小天下。非謂人之目力能窮夫天下之大。蓋以天下瑰竇之境。莫逾泰山。至此而襟懷超曠。與天無窮。雖極天下之大。不足以搜吾慮也。同治四年。福成參督師侯相。曾公莫府事於徐州。公之道甚崇閎。而不阻人以難陟也。其望則海內之所宗仰也。明年移駐濟甯。以巡閱河防。紆道泰安。觀形勢。遂登泰山。余與李榕申甫。黎庶昌。純齋。方宗誠存之。王定安。鼎丞皆從。四月。旣望。乘山

輜出郡北門三里入山盤曲上躋將四十里經名蹟尤著者十數皆縱覽徘徊始去越南天門折而東行有碧霞宮東嶽廟又北上爲岱頂卽天柱峯也山之大勢桐城姚姬傳先生嘗記之凡今登山皆姚先生所循道也僻不當道者俱不往所歷未逮茲山百一然其景之淑氣之靈各擅勝槩意象迴殊則狀之不可勝狀也余故弗著方余未至南天門時紱道陡聳巍矗天半仰睇巖隙白雲孤翺歷階可升不知所極俯視則一線危磴窈深莫測目眩神駭超趯卻顧屏息釋慮鼓勇復前俄登天門道忽坦夷異境頓闕覩所未覩方自幸嚮之不遽

止也。迺趨岱頂，極目四眺，諸峰起伏環列，相背相倚，若拱若蹲，皆如培塿。汶水東來，蜿蜒似帶，徂徠傑峙其上，高出羣岫，其巔髣髴可及山半，而郡城踞原野，殆如方窪。遙睇穹碧渺若無外，俯視雲煙瞬息變滅，然後知不登泰山之巔，不知眾山之非高也。人之自立，何獨不然？出埃壘之表，掃拘墟之見，斯萬物不能爲吾蔽，而物之殊形詭趣莫遁於吾之所矚。蓋有形之高不能常居，無形之高不可斯須去也。是夕宿碧霞宮，四更後與純齋鼎丞趨岱頂，東之日觀峰，候日出，風雨驟至，寒甚，良久雨止，極東紅光一縷，橫亙凝雲之下，俄而璀璨耀目，日

輪晃漾若自地面湧出體不甚圓色正赤可逼視其上
明霞五色如數百匹錦顧視女牆日景甚微忽又不見
侯相以陰雨竟夕未觀日出笑曰君等識之天下事未
閱歷者不可以臆測稍艱難者不可以中阻也越三日
馳還濟甯遂爲之記

方存之云此題若仿尋常遊記敘景雖工譬之摹繪
天地難免挂一漏萬必從登字著意斯謂避寬就緊
然有姚先生登泰山記一篇專美於前益令後人閣
筆熟玩此文於姚記之外別有發揮寄旨深遠壹切
浮辭刊落殆盡惟其簡切所以不磨作文要訣不過

如是

庸庵文外編

卷四

早

觀巴黎油畫記

見出使四國日記庚寅

光緒十六年春閏二月甲子余遊巴黎蠟人館見所製蠟人悉仿生人形體態度髮膚顏色長短豐瘠無不畢肖自王公卿相以至工藝雜流凡有名者往往留像於館或立或臥或坐或俯或笑或哭或飲或博驟視之無不驚爲生人者余亟歎其技之奇妙譯者稱西人絕技尤莫逾油畫蓋馳往油畫院一觀普法交戰圖乎其法爲一大圓室以巨幅懸之四壁由屋頂放光明入室人在室中極目四望則見城堡岡巒溪澗樹林森然布列兩軍人馬雜遝馳者伏者奔者追者開槍者燃礮者

大旗者挽礮車者絡繹相屬每一巨彈墮地則火光迸裂煙燄迷漫其被轟擊者則斷壁危樓或黔其廬或赭其垣而軍士之折臂斷足血流殷地偃仰僵仆者令人目不忍覩仰視天則明月斜挂雲霞掩映俯視地則綠草如茵川原無際幾自疑身外卽戰場而忘其在一室中者迨以手捫之始知其爲壁也畫也皆幻也余聞法人好勝何以自繪敗狀令人喪氣若此譯者曰所以昭炯戒激眾憤圖報復也則其意深長矣夫普法之戰迄今雖爲陳迹而其事信而有徵然則此畫果真邪幻邪幻者而同於真邪真者而託於幻邪斯二者蓋皆有之

俄羅斯禁蒐古碑記 壬辰

由烏拉嶺以東循黑龍江以北傳於海俄羅斯之東半國也其地廣莫無垠去中國絕遠又爲瀚海所隔自古未聞有著名大國然歐洲諸國人往遊者孤行冥蒐往往於荒野掘得古碑及金石器多有數千年前之物攜之歸置之博物院供玩覽焉俄人漸覺之關津吏邏禁益嚴而西人隱藏詭寄術亦益工幸而得出如獲重寶不幸不出受罰亦峻蓋西人好古如性命而俄人亦防之如寇盜云余謂極北空曠不毛之地至俄始稍稍開闢其先則皆鴻荒也而何以亦有古蹟豈書契以前嘗

有極盛之國於此邪。抑漢魏以來。匈奴鮮卑柔然諸族。強則侵中國。弱則被逼北徙。遁逃至此。挾而藏之邪。大抵土愈荒。則闕之者愈久。而物亦以古而愈珍。吾謂訪古器。羅珍物者。當於此等荒土求之。

向伯常哀辭 乙丑

余友向君師棣字伯常世居湖南之澧浦湖南地曠奧
擅衡嶽洞庭之奇勝乾隆嘉慶間往往有聞人今相國
毅勇侯曾公以忠孝文武爲邦人倡獎拔英雋中興名
臣之在湖南者十八九蓋山川偉氣磅礴鬱積數千百
年至相國而始發之其後進之士亦且喁喁嚮風爭以
學行經濟相砥礪伯常其一也始伯常居里時與嚴咸
秋農爲友秋農固淵源家學才氣英跼而不輕許可者
同時又有舒燾伯魯以治古文辭鳴於時先十餘年卒
三人者皆年少爲時彥相國目爲澧浦三俊者也同治

元年伯常持秋農薦士書走數千里謁相國安慶留佐戎幕而秋農遽卒於家伯常得盡交海內賢士所學益大進相國嘗密疏論薦其才四年夏相國督師勦寇北上招余入幕府俾與伯常及遵義黎庶昌蒔齋同居時方盛暑蟻舟淮浦每風月之夕相與布席艦艚縱論古今大局成敗興廢之所以然暨曩哲建樹博隘學術純駁追溯文章源流以究其升降利病甘苦證曩至夜分不輟蒔齋志雖銳而稍沈默伯常意氣尤豪健其議焱興濤溢邁往莫禦嘗自稱喜讀漢書孔光張禹傳所以著爲大臣者無大節則學行雖美尤足誤朝廷而隳世

風其爲戒至深微也。喜讀趙廣漢韓延壽等傳。謂彼數子者。才皆不世出。而世俗繩矩。亦自不足以羈之。然其高能瑰資。治事精整。各有獨絕之詣。用能輔漢吏治。與三代比隆。意蓋隱以自命云。其爲文。不屑屑以桐城軌範自拘。每至得意疾書。如洪波汪洋。雖浮沙淤泥。未暇澄清。而不能阻其百折必東之勢。同人數用世才。必曰伯常。余與純齋咸自謂弗如也。已而隨大軍移駐徐州。伯常忽遭疾。八日而卒。年僅三十有一。相國率僚屬弔奠如禮。將召其族弟金陵而歸葬焉。時十一月十八日也。嗚呼。遊處半年。中道訣別。追憶曩時。艤舟之樂。邈不

可得抑何天之豐其賦而嗇其年也可哀也

辭曰嗟子擢秀於南國兮播蘭芷之高芬韞異寶於荆璞兮固和氏之所欣忽摧折於半塗兮闕英華於終古愴二老之煢煢兮魂歸去兮泣杜宇人生莫不有死兮惟修短其難知遺孤苟承委祉兮儻副余中心之所期

祭莫侶亭先生文

辛未

維同治十年冬十月戊午朔越三日辛酉無錫薛福成
謹以清酌時果之奠致祭於莫君子偁年丈之靈曰烏
庠我初見君歲在乙丑飄然一翁神愉氣厚彭城戎幕
兩月聚首君之閱覽夙聞海內辱君下交爲折行輩稽
經諏史每聆警歎自昔黔中僻處西南儒風樸略古訓
未諳君開厥先博討窮探溯源漢代許鄭之囿閒以詩
鳴宮徵並奏篆書所法泰斯周籀閒雲偶出輝映寰區
公卿交薦聲徹天衢君心泊然以書自娛廣搜古籍琳
琅充積宋槧元雕珍逾卞璧百方鉤致精心研覈萬卷

玢璘日對古人。古人雖往，精神可親。敝屣黻冕，擺脫風塵。赫赫相侯，豪賢所主。君挺瓌奇，相從江許。獨以餘閒，證歸今古。吳越之間，山水多奇。扶筇杖策，樂且忘疲。胸懷超澹，繫我之師。自來治城，過從恆密。猶憶夏五，訪君之室。深談亹亹，不減昔日。秦淮泛舟，暑夕炎歊。賓朋謹譟，樽酒招邀。隔舫款語，小泊溪橋。詎謂一別，遽不相見。君嗜孤遨，淹留下縣。我從閱武，亦馳郵傳。忽聞噩耗，始怛終疑。曾無宿疾，而至於斯。旣接赴書，發函驚喜。輶車南歸，長塗萬里。回首曩游，歲月如駛。敬奠一觴，靈其冥止。尚饗。

祭季弟文 辛巳

維光緒七年閏七月辛卯朔越六日丁酉宜祭之辰期服兄福成以清酌庶羞之奠遙祭於季懷七弟之靈曰嗚呼吾弟遽至此邪以弟天性之孝友植行之清峻籌略之闕深文學之俊邁微特吾自愧弗能及卽吾二十年來友天下士所見於朋輩中者蓋寡方謂志業益騫經晞古人者必吾弟也發其所韞濟時難而匡世運者必吾弟也孰料位不酬其才年不稱其德而中道摧折邪世運之不昌吾道之不行於斯可卜豈獨吾家之不造邪嗟乎人生不過數十寒暑修短雖殊同歸於盡日

月推移如夢一覺豈弟已先覺而吾猶在夢中邪抑此
吾之噩夢而非信然邪吾兄弟六人惟吾與弟年尤相
近自髫髻以至成人讀書同塾應試同時中年各走一
方雖離合不常然攷問德業商榷時務每論一事馳書
不厭四五反雖數千里外如面譚而今已矣德業莫與
攷問時務莫與商榷矣弟之宿疾時瘡時發已八九年
猶憶戊寅之春吾與弟分馳燕蜀執別滬上語至夜分
依依不忍相舍而吾尤以弟疾未瘳爲慮旣而聞弟抵
蜀後疾竟不發私心竊喜以謂從此釋然矣今歲春夏
之交弟自蜀還里累書告以將北來一晤爲十日譚鳴

呼孰謂弟竟以痼疾而隕其生乎孰謂滬上一別爲永
訣今夏一書爲絕筆乎積懷未傾凶問突至病不及訊
其醫藥斂不及視其衣衾吾行負神明此憾殆無終極
自今以後存卹孀寡教育孤兒吾與諸兄弟任之搜輯
遺簪表章潛德吾當屏棄百事而獨任之吾弟無以此
爲念痛矣迫矣言盡於此矣嗚呼哀哉尙饗